



徵甫里逸詩啟

時逢

聖世康衢與擊壤之歌代產畸人間谷有考槃之
咏挹清風而弔古陸散人之鬪鳴欄存揮彩
筆以書懷趙王孫之換鵝經在故吳淞夙稱
詩藪甫里舊號吟壇然而一曲陽春千年陳
跡伊人之或隱或顯幾類少連其詩之若存
若亡差同華黍零珠碎玉覆來未盡瓶頭剩
豔飄香誦去猶餘口角侯芭未遇子雲之奇
字誰傳楊惲不逢司馬之鴻編然晦鳴呼伯



夷清聖尚附青雲歲輦高賢幾沉白杜自古
先民之製作皆賴後輩以表揚索隱探奇旁
搜遠紹余今老矣抱虛願以難成若有人焉
感同聲而相應庶不使錦心繡口付之蟲臂
鼠肝也乾隆五十六年歲次辛亥冬十月之
望

甫里逸詩集序

乾隆戊申秋余乘楂北上沿江達淮亂河漫
之而遊至庚戌夏抵京冬返棹入吳蓋息於
水腹奪晶於覆者三年所至觸景感懷輒拈
數韻以志之凡古跡名勝尤留意焉雖音律
未工不堪一噓總而計之已得一千餘首又
回溯三年前南至楚粵閱五秋亦得詩二千
有奇從學詩二十餘年以來所作各體今約
所存不及五千餘或自失其橐或爲好事者
持去皆旣逸耳嗟夫余今齡未半伯猶然生

存也尚不免有逸詩矧詩人伯歲之後耶雖
然古人之逸詩亦多矣如左傳載侯河之清
周道挺々等篇戴記載曾孫侯氏相彼盍旦
等篇論語載唐棣之華偏其反而巧笈侑兮
美目盼兮等篇皆逸詩也此史遷所謂其軼
乃時時見於他說者也卽三百篇而後漢魏
六朝以迄唐宋元明中間詩人不知其幾何
詩篇尤不知其幾何然世所傳者不過若而
人人所傳者不過若而詩詩篇不盡傳猶之
可也詩人不獲傳則可悲矣何也古人云吟
成一箇字撚斷數莖鬚又云必嘔出心肝乃
已復有十年成咏三載卒吟者其辛勤爲何
如况其人之詩成篇成卷吾不知其撚斷幾
許鬚嘔出幾許心肝且閱歷幾許日月矣儻
就汨沒能勿悲乎今姑蘇甫里自陸天隨與
皮襲美吳羅諸公唱和往還流風遺韻歷々
相承逮吾

國朝崇尚詩教稱極盛焉讀書嗜古之士若隱若
顯類多精於音律以言其志以道其性情第
境遇之豐嗇各殊有獨出已稟業經問世者

有子孫式微蕩焉靡遺者此則均無庸計及
已唯是欲自傳而不能傳將及廢而尚未廢
者苟有人焉如左氏之采侯河周道戴記之
著曾孫盍旦聖門之引唐棣巧笑則亡而僅
存詎非幸歟甫里諸君子興念及此不忍泯
滅里中詩人之苦心爰倡同志旁搜遠羅俾
工於吟咏者出其所存酌取數章壽之梨棗
以垂永世不以一格繩之惟求溫柔敦厚有
闕世道人心足以昭懲勸而鼓吹

休明祖我

夫子刪詩之意雖云豹窺一斑要

其蔚文亦已槩見詩卷長留天地間則名氏
亦得以長留天地間矣良工心苦不幾稍慰
哉斯集也殆如侯河諸什遇左氏諸人逸而
不軼誠不啻采滄海之遺珠令人寶之掌上
矣不亦善乎茲承諸君子屬序於余余嘉其
有表微闡幽之雅不敢以不文辭爰謬臚所
知附名簡末以相麗於不朽是亦千萬里遊
人之異數也嗟夫余學詩三十年踪跡半天
下所得句若干篇他日賦歸去來尋我江西
詩派亦安得有甫里諸君子者哉

時

乾隆五十六年孟冬之朔廬陵永陽彭 政
治堂氏拜題



育里逸詩上卷姓氏目錄

馬起城 戴文光 戴石房 許元方 顧 棐

亡名氏 徐南復 戴 鎬 戴失名 戴穎昉

閔 暹 陳仲謙 許陸圻 無名氏 徐遽庵

蔣 鉞 張 夏 蔣玉房 陳秉鐘 許 棗中

管 鴻 安 期 蔣 注 許王儼 陸 錦

許 濼 閨秀 熊 湄 畢 朗 趙蘭好

許 氏 朱 正

下卷姓氏目錄

馬 萬 陸鴻典 吳志寧 周之琪 馬上錦

陳學曾 李王章 陳朱組 朱林 趙格

蕭翀 馮承宗 陳璋 陳埏 高顯宗

許念祖 陳樹滋 許名崙 許士奎 韓澹

趙接 戈湘 夏點 陸焜 費湜

韓世琦 朱承祖 陸澧 夏鏞聲 沈振

許開岐 陳鳴鏞 蕭日襄 陸鏞 方外

卽中師 超 晟 願 雲 育 賢 行 彝

德 元 流寓 彭廷梅 李果

印一百部五十分送四方五十待售紋銀貳錢

甫里逸詩 里人同集

馬起城字謙字號貳師明季人 塔時從桂王

封得宜陽簿年七十八致仕有長鳴草一卷藏

馬澄川家

贈別薛浩生

衰年易為淚况值生別離別離非異鄉亦胡足深

悲所別非知己涕泗亦何為浩生薛季子少小同

襟期睽違將十載無時不懷思懷思無由見瞥然

遇京師談心驚且愴對面信還疑風塵共奔走總

為名利馳機緣偶相值兩人稍舒眉君能附驥尾

我亦桐封隨跋涉幾萬里攜手楚江湄腹飽湘水
綠目飽衡山奇或論詩雅謔或命酒圍碁爲歡未
云足胡遽生參差聚散果無定忽爾聽歌驪正當
搖落候又在天之涯丈夫無別淚殆爲妻與兒苟
遇同心者能不爲雙垂臨風數揮灑哽咽無言詞
春日送吳炳甫北遊時從楚歸

相逢絕喜是殘年未解行裝復整鞭屐上白雲還
帶楚囊中彩筆又投燕帝鄉風景雖堪戀故國鶯
花自可憐如此驅馳頻作客金閭柳色亦蕭然
虎山橋看落日兼坐月與李雲庵談禪

四山圍合一橋橫
倏爾風煙變態增
萬頃清光明
月染千峰紫色落霞蒸酒酣自謂高陽侶慮息權
爲有髮僧勝地良朋談妙理歸來面目也堪憎

許中翰得閒堂初成詩以贈之

名園初構得閒堂刻楠丹楹雲母墻赤日不知因
茂竹清風能至有垂楊晝忙或是棋爭劫朝苦除
非酒中傷莫謂此中堪自適還須簪筆侍君王

送內弟湯禹民之楚

一番雨過滿城秋把酒燈前話楚遊仗劍已看能
御李揮毫應不媿依劉猿啼漢月生鄉思鴈叫吳

霜動旅愁總道丈夫輕遠別莫教人怨覓封侯

春日憇許中翰園亭

為愛名園似辟疆偶乘新霽一徜徉苔封洞壑雲
皆翠花壓池塘水盡香詩思忽生天際閣茶煙時
嫋竹間房最憐雨後春泥滑脫屐扶筇度石梁

題梅花墅

梅花別墅勝無窮百畝池塘十畝宮坐石置身邱
壑內步廊着脚畫圖中花間柳畔橋頭月竹裏荷
邊水面風得向此中間一日不知人世有三公

桂王之國衡州幸獲隨封口占二律兼呈獻

覽存一

玉葉綿延亘四方一枝又喜向衡陽鳳鷄龍種彬
々盛聖子神孫世世昌洞有朱陵仙子窟山當龍
渡帝王鄉對揚自愧無裨益願竭微忠效寸長

寓中漫題

不才久已似莊樗四壁徒存感索居逆旅蕭條思
對酒空囊羞澀歎無魚浮雲世態從輕薄湍水人
情任毀譽壯士自知顏色改牀頭止有讀殘書

送湯倩孟儒

殷勤留子去遲々擬欲裁書訪故知無可語人羞

作東不堪題贈懶吟詩十年只飽三湘水四海徒
存兩鬢絲親友若徵予近况好將此語代爲辭

咏雪

江南一夜雪詩興十分豪壓水翻銀海迴風捲玉
濤擁爐多勝賞載酒競憑高果是豐年瑞何妨典
緼袍

與陳九巖夜臥談心

莫訝世途窄自嗟生不逢行慙成畫虎技悔學屠
龍歲月弦催矢聲聞筵撞鐘猛拚今夜醉聊且破
愁容

鄧尉山看梅

山中多勝賞梅發更清狂入澗穿雲白迷花臥雪
香豈惟風淡蕩最是月昏黃折向燈前看扶疏影
一牀

宿月巖上人山房

理棹過山寺逢僧話夜長飯蒸松子火茶煮豆花
香下榻依禪座分燈借佛光曉鐘雲外落滿樹奏
笙簧

移榻

病却因愁至愁因病却舒暫辭收責券不答問安

書便客頻移榻怡神且禁梳藥爐茗椀外綠樹午
窻虛

言志

本無心出岫其奈爲貧何事簡堪藏拙官閒好養
疴蠻言新謔少老夢故人多吾得吾真樂精廬韻
友過

晚坐期友人不至

數聲橫笛隴頭聞幾樹疏鐘隔暮雲坐破落霞君
不到清光滿地與誰分

紅梅

香浮紙帳夢魂清一樣窻前伴月明恠殺馬支擔
誤我至今雪裏未知名

春郊即事

桃花含媚柳含嬌載酒攜琴過短橋任是畫工能
肖物數聲啼鳥也難描

入秣陵自送

祖道誰將酒一杯片帆獨向暮潮開多情最是船
頭雨夜半和愁送我來

江行

頻年作客渡江時岸上青山入酒卮吾道青山依

舊好青山道我鬢添絲

韓信

謀臣策士總紛紛誰比淮陰蓋世勲一自假王輕
易乞當時真帝便疑君

偶起即事

靜中長日果如年一病經旬只解眠強起索匙開
小院桐陰滿地竹參天

聽雨

絕離燕市語又聽楚鄉言維有窓前雨聲之似故
園

吾志齋記

紹興倪大繼景周

吳有名士曰馬貳師先生者工舉業辭邑庠
而赴國學兩不獲售尤研精於聲韻肆力於
篆隸日與詩品說文相寤寐今官桂藩余每
出鄙言請正幸每教之偶見齋頭有額曰吾
志訝不識也先生笑而答曰吾聞士各有志
我之所志追想生平如幼而誦習章句此畏
于塾師之夏楚耳非吾志也長而聽甲乙於
棘闈此迫於父兄之命耳非我志也老而戀
升斗於王門此牽於妻子耳亦非我志也必

若吾志惟是蒼翠滿前溪流到岸古樹可稱
老友脩竹可方主人爰置莊居層樓眺之使
四時景色一帶煙霞日來伴我、與二三好
友徜徉其中聽鳥啼於枕上報花開於席前
琴也可奕也可醉而且吟也可飄然不知塵
世之是非此真我之所志而取以命名之意
也雖然志在吾志之得不得在天非家富不
得非年茂不得即家富矣年茂矣而四害乘
之則亦不得藥石不離一害也婚嫁未完二
害也宦轍羈身三害也俗言聒耳四害也我

既無二得之緣而亦或不免四害吾其如志
何哉則有空懸兩字以誌不忘而已何足聞
於有道耶余曰不然使志必皆同則春風沂
水不得獨許於聖門矣昔有圖畫佳山水於
寢室時時從枕席觀之者題曰臥遊然彼之
畫圖在四壁先生之畫圖在腹中何不張之
以記此齋遂撫其言如右
貳師詩清空一氣讀之如嘗太羹甜酸苦辣
鹹皆待之以成味然後知淡之爲妙即素以
爲絢而玉帛非禮之本也

戴文光字罔得號章甫吳庠生所居名必有齋
明神宗末坊本靡濫因取古今正典歷科程墨
左傳等書校刻行世崇正時沒

古別離 擬江文通雜體詩三十韻

送君遠行邁乃在河之湄道路實阻脩安能不傷
悲海燕依故巢胡鳥辭舊枝一去蘆子關旋歸安
可期胸懷千萬結執子無一詞但覺晨風厲白日
浮雲馳白日何感迫浮雲多蔽虧賤妾秉詩禮金
閨深自持

李都尉陵從軍

甫里逸詩
必不原一
易安書屋

吉日從征車凌晨薄霜露徘徊盡尊酒踟躕不能
訴手柔卓鵬落苦被微名誤悠哉雙棲鴻翱翔共
晨暮而我辭家室萬里馳煙霧儻寄塞垣書淚落
霑衣絮

班婕妤詠扇

團：手中扇本自翠織成上有隻鴛鴦交頸相和
鳴承君貯華幄枕簟微風生竊恐涼飈發委置勿
復陳物情有代謝恩寵多變更所惜攜時久寧忘
君子情

魏文帝丕遊宴

良夜命嘉客置酒陳華軒層臺恣臨眺曲水波微
翻脩竹夾廣道幽厓叢芳蘭羣才富文筆濟：皆
登壇有客善絲桐援琴爲我彈：罷三歎息皎月
呈雲端飛觴雜宴笑四座生羽翰幸茲羣英集須
永今夕歡無令歲月逝徘徊起長歎

陳思王植贈友

高梧覆金井一葉飄新秋獨居不成樂號呼求其
儁睠我同心士褰裳噬未遊興文麗丹腹薇蕨常
不謀猶恐寒飈至被褐無重裘緇衣賦適館杖杜
咏道周爲君羅第宅烹羔炙肥牛西箏發逸響東

瑟揚妙謳雙闕歟聯袂馳道遵輕輶璠璣自有芳
志士自有求嗟哉雲中鴻翱翔恰好仇但懷金石
操抗志以忘憂

劉文學楨感遇

亭亭百尺松產自山之陽託根本逼仄偃仰凌雪
霜不遇匠石顧誰與登明堂雕文錯綺構謬厠棟
與梁微禽假長風羽翮多輝光爨桐得賞音焦尾
叶宮商悲予流離士柔翰工文章一蒙君王盼國
士稱無雙朝隨承明廬夕宴華池傍苟不勵陳列
丹青徒彫傷勗哉修令德葵藿詎能忘

王侍中粲懷德

余本秦川子喪亂違西京豺狼盈路隅故國紛荆
榛適遠不自主流滯衡湘濱日暮猿狖噉鳥棲非
舊林帝子在何許蒼梧渺難尋登樓初有作睇望
空沾襟離家越多載中土俄盜平披雲庇天宇廁
足儕羣英君王誠折節公子特賞心歡宴西苑曲
擊楫漳流清豈意瓊尾餘遭逢垂令名顧非桃李
質永懷報瑤瓊

嵇中散康言志

鳳凰飛丹山一舉翔天池鸞鳩捨榆枋局促中藩

南里逸詩 必有齋三
籬云何徑寸翻謠咏翻相嗤余志抗塵表不受繒
繳施神龜死千載朽骨釋羣疑吾寧嬉濮水掉尾
歸塗泥臺佟洵高蹈蒙莊真我師雅懷山公訓頗
悔山濤知滄、濛水溜奔、琅玕枝采藥鍊黃金
仙人豈余欺緬彼洪厓叟徜徉山水湄被褐不完
體常有好看儀逝將從之去松喬庶可期

阮步兵籍詠懷

曠士不諱飲達人亦苦饑有酒不斟酌何用采薇
薇攜持交甫珮將以贈二妃日暮遵江渚痛哭霑
我衣咄哉蘇門翁誰能測其微

張司空華離情

清商扇戶牖微月映空房離人思中宵雅步減容
光素塵拂簾幕蛛網牽羅裳延佇欲誰訴攬衣含
悲涼已看春草碧可歎秋蘭芳君知妾意苦歲寒
誓勿忘

潘黃門岳述哀

檻泉歟東逝耀靈竟西淹羲馭或重光流波無迴
還美人隔黃土俯仰增辛酸皓月經綺疏照我妝
臺南淒涼餘枕簟彷彿凭幃簾玉鏡縈網絲未忍
啓遺簪芳枝既連理好鳥亦鷦、彼物尚如此斯

人何以堪

陸平原機羈宦

弱冠遊上國遭時拖珮紳崇賢膺寵眷歲序更冬
春本非排虛翮且羅漫相櫻改役遵淮甸縱轡事
遐征親串一揮手飲餞清江濱遊子念明發長亭
悲弟昆激昂承明地慷慨涕泗零曠野少行轍荒
途杳無人梁陳旣躑躅京洛多苦辛睠懷吳門練
祇憶鱸魚羹寄言宦遊子何如還舊林

左記室思詠史

幼安避遼海仲蔚隱蓬蒿冥鴻非畏弋扶搖不終
朝傑哉張子房韓生亦人豪當其輔漢時功名等
雲霄如何赤松去淮陰醢市曹長卿雖善賦琴心
已微挑子雲擅令名美新終見嘲哲士貴處默達
人慕貞操豈知漆園叟鯤化以逍遙

張黃門協苦雨

重陰繫陽序積霧彌天末玉砌滋碧苔朱花坐銷
歇初疑蛟螭舞旋欲倒溟渤饑禽啄檐溜鸛鶴呼
幽垤信美殊未來三徑蘼蕪沒感此伯慮并何以
拯方割

劉太尉現傷亂

皇綱失如何妖氛橫相竊神州竟陸沉天柱將傾
折昔余仕中朝恩寵承累葉會遭如燬傷五內迸
愁絕留侯婦女貌佐漢稱人傑百里歌虞虜相秦
隆霸業鄧禹徒杖策雲臺首奇烈慷慨景前踪思
與羣賢埒撫戈不成寐聞雞轉騷屑捷足恐先鞭
龍媒爭蹀躞時乎不重來行理渡江楫

盧中郎謚感交

匡時藉鳳麟逸性成麋鹿世無連城姿砒砒溷荆
玉室邇忘歡愉人遐亂心曲倦翮思故林拊膺念
初服奉事歷五稔拱袂承清勗較書聞魯魚豫醮
叨醺醪忝竊鴈鶩梁糜此有道穀豈期人事違徵
車促行軸甫慙齊廷竽却濫邯鄲牧感歎迫中情
殮花戀疇風何時息圖南乘風附鸞鵠

郭宏農璞遊仙

三山杳難攀弱水深無底一爲汗漫遊渺然千萬
里遙望蓬萊宮臺闕中天起青鳥翼我翔朱門劃
然啓西母揮清絃軒皇彈妙指侍從皆上真容顏
美無比噓吸本沆瀣餽糧藉蘭芷日飲瑤池漿塵
味等泥滓朝采若木華夕弄青蓮藥肩隨浮邱翁
攜手赤松子

南里逸詩 必有齋六
孫廷尉綽雜述

萬物本陶鑄兩丸如擲梭曉聞莎雞鳴宵露霑庭
柯姬公久不夢吾衰發浩歌錢鏗雖永年元鬢亦
已皤蒙山羨一婦國門榮二疏擾々百年內誰能
永婆娑鯤鮪洵沫潤鵬翮雲霄摹寧知萬里風不
殊尺寸波繁憂鬚改素一醉顏微酡爲謝樓樓客
咄嗟將奈何

許徵君詢自序

東方稱大隱老商慕冲虛出處雖異迹冥鴻非殊
途悠哉高陽里東茅營敞廬凌晨躡行屩薄暮馳

巾車探奇恣所適賞心獨踟躕比愛鏡湖水翛然
卜其居丹厓渺畫圖清湍泳文魚時與揮麈侶訪
道南山隅川洄無停畱雲去無卷舒狗物多喪我
內觀務辭餘去矣絕塵牽吾將遂厥初

殷東陽仲文興矚

勝遊美茲辰沉漾陶情趣秋氣日夕來曠焉成良
遇旋淵屆叢薄鳴禽變高樹解衣愜冥搜憑虛縱
遐睇緬懷碧山岑乘風儻歸去選境非求賒所足
滌煩慮蕭寥得真賞極目徒延佇

謝僕射混遊覽

初景拂曙寒微陽淡芳甸幸茲蘭省暇招搖恣佳
玩朱英映輕軒丹萸翳行幘興至賞亦諧徘徊動
流盼叢條何歲蕤巖巒疊葱蒨良晨雖云樂秉燭
苦日宴崦嵫不還留物華屢代換撫時與慨并躑
躑起長歎

陶徵君潛田居

結廬依中田藝黍并藝秫藝秫足我酒藝黍足我
食今朝作勞罷荷蓑歸來亟南窓讀我書高臥聊
自適五柳日已長三徑菊堪摘隣父時過從移觴
餉寡寂頽然忘夕曛月出東臯白

謝臨川靈運遊山

孔樂寄山水真宰契高深維余厭塵囂結想事幽
尋晨興窮險絕夕眺歷沉冥遭迴歟昏旦徙倚滌
煩襟峰回緬蒼翠谷轉怖崎嶇欽猿鼯時叫嘯鐘磬
遺遠音金潭架石梁紺殿羅球琳涓乳竇滴瀏
瀏窻颺吟霏々雲出岫肅々禽棲林褰裳漱丹井
登頓憇長陰旣協靈區咏復慰平生心逝將凌窮
髮遺榮賦投簪

顏特進延年侍宴

周王豫豐鎬漢帝宴柏梁隆規軼曩制宸遊樂無

疆雲棟被巘岬松牖拂笙簧張樂遙谷應
華香龍躍在霖霖駿馳豈荒唐橫汾洽仙吹云亭
渺天閭敷文鵷鷺侍閱武攸飛良泚毫羽獵賦技
擊昆明塘靈禽展翟舞神魚挾舸翔開筵列金奏
鳴鈺集牙樁巴童娛清戲趙女謳霓裳小臣霑醴
醪大官出河舫皇心迴夷憚監史終矜莊旣叨湛
露澤敢獻鳧鷖章

謝法曹惠連贈別

肅舲指通津趣裝戒陬月徂遠心易悲把袂情難
別栖鴿雙和鳴去鴈孤征咽感此此離懷悵快不

能說繫舸澄湖汭飲餞河上樓徘徊一尊酒浩蕩
千里遊哲兄紉春服伊余曠征裘豈不念式好行
邁難自由江帆何蕭槭岸草揚葳蕤望巖積霰在
極浦朱花垂花馥摘堪佩鷁飛宵莫追離亭此揮
手含淒當訴誰行々西陵渚去去江東濱畫鼓殷
疊響翠巘空隱鞞契闊郡齋醺寤懷篇翰新何時
賦旣翕釋痲娛昏晨余行非得已子畱將奈何鑿
巖眷遊屐解纜帽風波落日惜餘景鳴榔起恓歌
無俾瑤華音悵望成蹉跎

王徵君微養疾

前里逸詩
山中有芳樹窈窕媚巖樓一葉墮商飈候蟲號昆
雞微雲淡澗戶華月皎前溪氣磅礴藥苗實徑紆瑤
草萋安期寧易覲真訣在香臍虛無采紅碧洗漾
升丹梯豈無桃花源褰裳路渺迷養拙事委順尊
生謝益醯壽能齊物化懷疴獨杖藜

袁太尉淑從駕

粉榆隆饗社宮廟儼瞻先敬恭攄將事齋宿盼升
煙典劇秩宗預儀尊羽衛專宵霽灑馳道晨霞冒
晴川離宮屏肅駕閭闔佇鳴鞭聲隨鳳輿杳虹拂
鸞旗懸寶欽周制禮詎覲漢求仙元酒盼初薦告

成凜終筵順動百靈悅豫遊羣化宣采風驗堯俗
雅奏譜虞絃廷雲旣卿霽莫卉亦芳妍威翔瀚海
外澤沛扶桑巔賜脯逮士女與宴隨班聯叨陪從
祀列忝扈屬車旋獨慙子雲術挾藻獻甘泉

謝光祿莊郊遊

開襟謝塵鞅解紱臨長風郊垆森爽豁浦嶼煙靄
重杖策陽阿曲浮舸陰渚東心遠理自愜路折徑
靡窮攢霞欣菊豔散綺惜桂叢愜此招隱賦緬彼
遊鷗翁黃金未可鍊榮名詎能終極眺從所尚庶
焉慎厥躬

鮑參軍昭戎行

定遠著投筆輕車冠沙場以茲遊俠客往往事戎
行秋高胡馬健風疾角弓良朝聞邊烽急夕徵羽
林郎千金募健兒八道過蠻方腰下跨血刃馬頭
掌雪霜寧甘衽磧礫未遑思故鄉昔來詔平虜今
朝擢護羌但覺移寒暑罕見皎日光取旗爭鞚捷
距躍忽殘創終當襲犀渠解纓繫名王射鷗交河
側勒銘燕然傍試問圖麟閣豎儒何足當

湯上人惠休怨別

哀壑秋飈起沈瀟悵遠思日暮湘江濱靈妃竟焉

依一折楚山柳再凋秦苑萸盛年蒙棄置芳澤爲
誰施朗月散清照桂陰移曲墀寶瑟久未展朱絃
音較微顧景總不樂感此鴈孤飛

先生以文名未聞以詩名讀此三十首知其深
於古矣

此豪得之散帙字跡潦草蠹食模糊三豕之誤
望高明訂定

戴石房名未詳諸生雲葉之兄

將發白門呈即中師兼囑袁薛二子

暫遊非我意鄭重戴師恩豈念虛名貴難忘聖道
尊人應慙賈董志已在邱樊聊復成離別消魂未
足言

在俗真難免臨川亦自憐四投京兆策三上渡江
船岸憤稱才子騎驢逐少年道人何必異一笑裏
青氈

今歲乃多暑清筵衆暫空示同摩詰病不損辯才
雄蘆荻秋江月梧桐法院風稍需山桂滿末座指

歸蓬

世變已非昔吾徒何復求
端憂有二子揮塵足三
秋白恰荒山暗青楓故國愁
從來迷出處應向至
人謀

送圓聞赴西園避暑

夏至以後日如火法師揮汗不得坐
宰官比邱有
劉公盤渦招手聽松風松風颼然冷
人情扁舟自
向城濠行師行未行三歎息欲出中堂淚霑臆世
間解事人已難聖道能聞豈多得我意憐才獨有
君世人何乃相紛紛十年磨劒腸空熱平扣門頭
湯灌雪君不見豫章千尺凌蒼霄狂風驟雨誰能
搖

許元方字季通庠生鄉飲火賓

寄長子虬思州府任

太學何藩且一歸九年甘旨誤庭闈休言客路三
千遠須信人生七十稀下腰雖無季子印篋中尚
有老萊衣歸期定約春前後莫使高堂賦式微
劒閣凌雲鳥道邊艱難聞說上青天江山萬里身
猶寄鴻鴈三秋信香傳落葉打窻風似雨孤燈背
壁夜如年老來一掬鍾情淚幾度門廬欲泫然

自題墓道

世居甫里水爲鄉敢冒箕山姓氏香萬歷壬寅初夏誕季通其字諱元方

自揣生平無可傳不須誌狀乞如椽聊題片碣留名姓囑付兒孫立墓前

顧斐字也亭

辛巳生日述懷

七十忽過隙駒不堪回首是居諸推遷寒燠知無定俯仰乾坤樂有餘往日詩書違耳目多年草木戀階除心無繫着偏宜壽始信長貧未負余

亡名氏詩一卷丹黃塗抹似先生手定之作者其詩意係明季時避亂而隱於山者橐藏陳漁莊家

居山吟

洞庭烽火幾時寧海角欣無鼙鼓聲難把長繩繫落日那堪塵夢慰勞生東西閣外雲非舊大小山中花有情客到不須談世事芹尊暫自樂清平文譽何須今古聞但求身不涉塵氛眼前事業琴詩酒方外友朋猿鶴雲樵斧丁丁驚虎夢漁歌乃擾鷗羣就閒靜處山阿裏面面煙霞憑我分

莫論時乖與世違，疏狂端合老荆扉。
雪埋梅蘂琴聲凍，酒熟爐頭詩興飛。
餘得韶華宜自用，免將情性強人依。
若除花鳥和山水，欲合幽懷已覺稀。
可厭閒愁愁不盡，漫將清思散雲端。
貧來花月終堪近，老去林泉始得安。
棗栗稍儲供晚食，松杉聊拾禦春寒。
試看江面風鋪簟，獨伴沙鷗坐釣灘。
達生何用苦淘沙，棄智方知事事賒。
莫使成儀愧罔兩，休教心性毒巴蛇。
萬程鵬路天難問，三尺魚竿舟可家。
靜裏迴光長返照，青山綠水亦空花。
夢裏生涯豈是真，枉教忙殺夢中身。
煙霞有待松

千樹山水堪親，月半輪花笑春風。
常載酒雲橫秋浦，獨垂綸陶然自適。
塵埃外塵世何曾見，少人紛紛世事總難裁。
暮齒何容問別才，稅外稻梁儲鶴食。
林間桐梓備琴材，攜尊花底春香醉。
燒葉峰頭秋色開，畱得客談西岳勝。
瀑泉如練入窻來，山頂喬松栖鶴雙。
亭銜蒼翠俯長江，茶林日煖芽盈寸。
梨釀春深花滿缸，閒理殘書魚竄榻。
細敲舊句鳥窺窻，柴門自有白雲護。
不用人間吠月龍，高臥深山不計年。
優遊尚志樂堯天，幽篁窻外藏新雨。
弱柳門前續斷煙，畱鶴莫教雲獨老。
愛花休

使月空圓試看逐利爭名客早晚閒吟豈偶然
陰々山色曙光闌一枕春心作幻觀林茂不知風
力緊巖幽偏覺雨聲寒燈搖清影安禪易香殫錦
衾化蝶難但望雲開煙霧捲殘花猶剩醉中看
紙屏木榻一瓢輕身世渾同松竹清自古金魚皆
故物從來寶鼎豈完名風霜足鍊千秋槩雨露空
滋片刻榮但得機忘天地外蒲團何必覓無生
雨晴高閣鳥頻啼雲影時時過嶺西水漲蛟腥時
入座草長鹿跡半成蹊檻深但覺煙苔冷地敞唯
嫌月魄低看到景懷成一處莊生應恨物難齊

壺中日月不知年耳畔眉間別有天老鶴舞殘花
徑月新蟬噪徹柳溪煙客來自翦芳園韭僧坐頻
煎碧澗泉聯句西窓休刻燭尚淹清話把牀連

漠々煙籠溪半灣千林木脫老秋山水清水濁鷗
常卧雲去雲來峰自閒塵事盡驅青嶂外騷人長
嘯翠微間花期已屬籬邊菊好囑西風淨掃闌

一天清露洗松華翠濕重々枝半斜鶴羽淨飄紅
壁雪桃花爭燦碧溪霞鴨頭香噴初開釀鳥嘴春
深新試茶醉後逃禪學蘇晉坐中端不讓宗家
曉起方牀倚短琴紫霞斜向碧窓侵雪融臺榭春

猶冷雲擁庭除山更深廿載空懷遊越想一生不
負灌園心海棠有意迎人笑獨自銜杯仔細吟
獨上高崗撫碧梧一天秋色漾晴湖山腰帶雨將
迷寺水面生風欲卷鳧頭禿蒼松年自古頂丹白
鶴體應癯閒情每與閒心稱淡蕩行雲跡不拘
傍巖低隱一茅茨靜裏韶光刻々宜洞口好花常
愛月庭心奇石慣生芝竹陰半帶山雲轉泉響遙
循蘿徑遲莫道地偏無勝事鬪茶脩禊各隨時
一意藏修住嶺頭小亭聊自效休休莖抽白芷巖
窓淨花發紅蘭雲枕幽局對竹陰談欲罷尊浮月

色興難酬胸襟清徹同禪客非借青山作浪遊
蒲沿庭石綠纖々紫燕初歸高捲簾春不成愁何
用破花長凝笑每爲淹雲探午夢渾無覺風弄松
陰且莫嫌宿酒半醒餘興在漫將遺韻睡中拈
總於時事絕無關贏得閒心對好山却被雨淹春
日色幾令人負好花顏青猿空抱雲中恨黃石終
成溪上頑休向乾坤問古道一憑氣運自循環
金拖柳線晝初長黃鳥呼朋喧草堂日煖山川開
畫軸風和桃李煥文章縱饒好賦將誰賣寧若忘
機趁我狂當此春光常一嘯絕勝岐路歎亡羊

絕頂茅亭膝可容半生安分石常同一溪松竹招
山月半榻琴書擁谷風闌苑有人萬水隔武陵無
路片雲通能閒便是神仙客何處桃花春不紅
鶯聲代我喚春回未放天桃先放梅墻角香生鶴
獨立峰頭月滿客常來攜琴踏雪忘谿冷下榻論
心把甕開一醉搜吟多老興探奇直欲上高臺
門外楓林透碧霄清陰匝地覆檐毛琴張石上泉
聲咽花發村中酒價高客到踏殘芳徑草鶴歸飛
破白雲濤一潭朗浸千巖月常賺騷人下手撈
地僻方知巖更深栽花隨處可成林好將琴石臨

谿畔時把棋枰就竹陰四面崗巒供嘯傲終朝麋
鹿與追尋莫嫌茅屋容身小閒散偏能容我心
三尺魚竿狎白鷗野懷萬斛一虛舟空勞竹掃清
溪浪憑着梧飄故苑秋花豈無心照水笑雲原有
意向山浮滄州島路長如洗莫使煙迷十二樓
峻嶺奇峰橫榻前一江溜碧自年年鴈鴻空冒關
山雪鵝鴨深眠沙磧煙竹裏風聲時掠地樹頭春
色欲連天韶光正美休輕視湘水俱爲飲馬泉
青山潛入得心清獨遠塵囂已半生猿鶴結鄰松
結友煙霞爲念水爲情悠吟花下雲長老策杖橋

南里逸言
邊月最明芳草年々春自若不知世事日紛更
愛靜還從巖下居祇憐衰邁廢琴書一潭明月波
深浸半檻輕風花鬪舒對局每羸尊內酒垂綸免
歎食無魚如年長日愁虛度觀水尋花樂有餘
出塞英豪心自雄鼎鐘何日勒豐功行雲引得冰
心遠流水淘將老眼空但見嵐浮千古翠誰知花
發一時紅鱸肥江上不歸去鶴唳華亭恨莫窮
池上松篁可息機敗荷香散鷺孤飛一秋夢斷蕉
窻雨片月歌殘桐板徽水綠白浮魚妻小霜清紅
綴木奴肥閒雲且漫封蓬戶星斗高橫鶴未歸

疏嬾何須問帝鄉浮雲富貴總無常青山不許紅
塵染白日偏宜清話長竹裏敲棋聊啜茗梧間邀
月自添香箇中熱鬧曾無著老大於今心更涼
湖光潑灩接長天湖上晴巒各鬪妍花塢燕鶯鳴
暝日蘿溪鷗鷺臥涼煙禪僧有意移茶具漁叟隨
波泛釣船正好對風同一笑漫分新韻把詩聯
巧於炎處強殷勤失却今朝真見閒閒靜生涯惟
自適清悠滋味向誰分世情可久雙棲鶴雅道堪
親幾片雲萬壑千巖憑去住溪流一派淡無垠
迂拙原無經濟才隨山學圃有花栽
權籬曲折猿

常坐松戶深沉鹿自開
雨過檐頭先洗竹
雲來石上半侵苔
無窮幽思茶能助
汲水長將活火煨
乾坤半已化爲烽
借得山田學老農
未雨紫旂和露摘
早秋紅稻倩谿春
采來松菌煙霞味
製就荷衣寒素容
攜杖逍遙閒眺望
白雲來往幾層峰
風泉不許入書城
石榻依窻雲自生
百尺孤桐存氣槩
一潭止水永澄清
醉扶明月曳蘭珮
笑倚春風聽玉笙
花落明年開更好
眼前物我有何情
積暑蕉窻苦未收
浮瓜沉李枕清流
花鳴好鳥千巖曉
露咽新蟬萬木秋
還憶當年城北社
最憐刻

燭水西樓一池荷
菱香如故日晴波
眠白鷗巖色蒼々
苔色斑松聲謾々
鳥間關沉淪世事
風吹水浮薄人情
雲過山元鶴歸來
琴不寂老龍卧處
石俱閒春深惟有
農堪話枳槿花叢
弗必攀脫然遯世
與山鄰霞蔚雲蒸
日日新招月引泉
非破悶栽梅移竹
豈遮貧溪頭對景
尋佳句松下談心
來異人荷可爲衣
麻可飯一生坐臥
總由身宇內干戈
苦未消山中歲月
興偏饒江峰翠聳
煙鬟俏野卉凝脂
笑臉嬌樵徑探幽
雲自引漁村沽酒
柿先招萼絲豉化
盤堪媚醉把新歌
向瑟調

聞道潛真內可全
閒中且樂我殘年
半窓紅日花初醒
一榻銀蟾琴未眠
尊酒漫消梅嶺雪
棋枰敲散竹林煙
朝來自喜堪使鬼
苔積青々幾萬錢
春暮和風吹野曛
一窓香霧澹氤氳
蟹奴抓碎荷盤露
燕婢翻開柳閣雲
似錦花枝沿徑窄
如城書卷滿牀分
醉來蕉葉輕揮灑
錯認羊欣白練裙
雲歸遠岫鶴和鳴
煙散池塘一鑑明
茅屋風和嬌紫燕
桃谿日暝長黃精
三杯能使心豪放
五字須當骨老成
芍藥欄邊花幾朶
有情翻覺似無情
徑因窈窕不分三
近接南山結一庵
拔地青峰雲

半截連天碧水鏡
虛涵煙霞引得閒
心遠花月融將詩
意酣俛仰日從勝
境用免令顏面抱
空慙此心久矣與
山期木石分披水
滿池遯跡寧容完
娶後歸田何待折
腰時月因有度多
成晦雲爲無心去
自遲花鳥近情深
足契幽懷曾不願
人知暮年心事那
知愁坐卧從來只
自由詩詠唐人爲
倡和行稽晉代學
風流入山不過安
貧意采藥無非樂
道謀歷盡炎涼嘗
盡味白雲原覺勝
王侯朝來顧影每
相憐可向深林老
歲年且把琴彈飛
雪裏漫將酒醉凍
雲邊山梅有約宜
常赴溪月能

招休便眠莫爲白頭先自棄風流全讓李青蓮
峻嶺重雲天半陰石樓含雨綠苔侵花流香霧霑
元桁竹弄清音響素琴泉落禽鳴林寂靜蘿懸雪
積洞深沉依依鶴鹿知人性但惜人無鶴鹿心
蕭寺晨鐘頻促夢擁衾猶帶夢三分曉晴香滴花
梢露春暝情生枕上雲黃鳥遙傳幽谷語白鷗休
送北山文松風誤作茶聲聽可奈朝來酒尚醺
七十前消莫限春亂離日月認難真林巖可意休
輕視猿鶴相將漫與親花笑韶華誠燦爛詩吟景
色共清新壺天不外藤蘿裏何用無端歎路塵

矮屋疏籬自一家山蹊窈窕竹扉斜但臨金井長
培橘肯向青門學種瓜薇蕨新鮮塵外饌李桃香
豔洞中花雲深不是人間世春色秋光總可賒
冰在玉壺心地冷林深無處可趨炎漁樵道合殊
堪近山水情悠不惹嫌一榻日高雲掩閣半簾花
放鳥窺檐身甘澹泊無他欲好借清泉養我廉
長松千尺蔦蘿攀終日濤聲半嶺閒短榻深藏綠
竹裏虛闌斜架白雲間一潭明月光搖壁幾樹濃
花香滿山堪愛蓬萊峰頂鶴常來相訪每忘還
一念能安身便安還須識彼地天寬幸將中壽粗

疏得宜作荒山木石觀靜極自消情萬種閒時獨
享趣千端其間滋味誰能曉說與忙人笑欲團
歎我無能老鬢毛生民多難念徒勞百年閒想長
懷古一片浮雲空自高春日草茵看柳浪秋風石
枕聽松濤琴書滿眼心尤嬾意趣惟將寄濁醪
倦和高人七字章啓幃漫步石根旁雲牙風動一
溪淨石髮煙生萬壑香甲長紫芝宜鶴喜苞開紅
樹逞鶯狂鄰翁亦有園林興雨過移花種竹忙
枕簟新涼送邃谷銀牀梧葉下層巖晨光入室千
林吐暮景橫空半閣銜學舞鶴鷄矜羽翼思歸燕
子嬾呢喃西山佳氣懷俱爽不曉悲秋淚滿衫

霧

漠漠生江上霏微霜不成如煙霑有跡似雨濕無
聲暗鎖垂楊恨輕籠芳草情日高澄萬樹啼鳥喚
新晴

居山吟情寄於詩而借景以發其情詩雖廣
貫之可作一章讀楚騷多引美人香草以致
其反覆纏綿之意先生實祖此法至於字句
之鍛鍊乃其餘事而聲調又其末也

徐南復字休仲號雪厂四十不再娶無子著有
道德經約義匏繫集其書失傳族孫守謙藏辭
世歌三百餘首日憑虛語錄壽九十八

自誄詞

爾貧非病爾病非心雖病且貧不愧衾影死何足
憫獨無桐音生未爲苦賴茲嘯吟發明道德涉獵
古今脫灑塵世開豁胸襟本來面目固如是神遊
三島誰相尋

秋夕

雲過山仍碧砂沉水自清秋聲木末起涼月夜窓

明隨意開書帙忘憂滌兕觥病軀誰是侶蟋蟀近
牀鳴

辭世作

花開還復謝開謝自有時疇人怨風雨只爭疾與
遲
乍見梅花發又見梅花落風雨早摧殘梅亦不知
覺

畫菊

筆底黃金花壺中白玉酒酌酒坐花前得似淵明
否

戴鎬字雲葉有燕臺草雜草一卷陳果園藏本
其詩散見錢午莊逸詩鈔

元夕篇

古來燕市繁華里夜漏初傳歌鐘起
朱樓大道傍遙遙紺闕垂雲裏今夕何夕當上元
千街燈火聲相喧妖姬如花卷帷幔驅車直上長安門
門前錦帳多如簇火鳳山鰲滯行轂聞呼越女進珊
盤更遣吳娃傳蠟燭龍笙象管闌九衢繞莖豔發
紅芙蓉揖客試嘗醺醪酒開筵初出鱸鯉魚仰天
明月何皎皎俯瞰星橋星更小當時曾照虢夫人

至今粉黛空燕趙燕趙佳人白雪裳金翠首飾明珠璫自憐十五工歌笑結伴行燈樂夜長夜長坐惜章臺露青驄一步三迴顧翦彩縈成連理枝銀花折盡相思樹城隅羯鼓正轟天醉擁邯鄲挾少年不惜珮瓊邀一笑寧論金彈擲千緡今宵樂事誰能數曼鬢輕鬢集如堵院外秋韃舞鳳凰尊前玉柱調鸚鵡有客乘春上苑來耳聞目擊中心哀故鄉無燈不少月勸君莫陟黃金臺

寒食歎

去年今年兩寒食去年浙東今薊北我家迢迢數

千里年年欲歸歸未得塵沙滿眼不可道黃日慘澹風雲黑長安春意何蕭條遙看燕嶠無顏色我生忽過三十春頭毛種種鬢將白手把毛錐四寸餘南北奔馳事行役客愁夜夜不肯眠每至中宵涕沾臆有兄有弟少別離有母有母遭棄擲只今江南三月天踏徧東郊與南陌古塚纍纍掛新紙野哭家家盡恓惻我獨何爲不能一尊酒一豕炙如生如存供子職公然策蹇排闥闔披荆欲問銅駝跡銅駝遺事未可言人生莫作遠行客

猛虎行

長安白日行人阻白額斑文出猛虎室無居人巷
無車夫持妻哭子抱父再拜告虎言殺人爾何苦
騶虞麟趾百獸尊小草細蟲皆得所何爲磨牙吮
血齧人屍前畏強弓後畏弩猛虎踞地向人言我
守天門帝容我橫行長安都市中鼓盪風雲在吞
吐朝出食人臍暮出咀人腑吾虎何如甯成怒

擬長相思

長相思在朔方烏啼恰々鳴匡牀北斗漸下團清
霜金刀玉翦爲誰濕雙々淚下捲流黃昨宵憑夢
到君傍眼見蜀山之突兀耳聽隴水之湯湯雞鳴

東方日漸出紅羅繡被空蘭房長相思傷心腸
春風如醉香雲橫高樓含怨彈銀箏一彈初作淥
水奏再彈復作鷓鴣鳴因風迢遞出瑤京君若有
情君莫聽巫山蒼茫湘水清水長不可越山遠何
時行斷腸人不見寂寞音書寄紫鱗

咏馬

冀北真奇種驍騰萬馬空日開雙電紫毛散五花
紅躑躅金河月驕嘶玉壘風遭逢報知己驃騎托
成功

贈郭臯旭

當年上國佩鳴珂喪亂誰憐隱薜蘿謝眺門庭宜
草樹輞川圖畫總詩歌舊交零落南皮少尊酒淋
漓北海多聞道長楊思獻賦忍教詞客老巖阿
送錢宮聲沈匡來北上應青城太史之招
十年搖落惜離羣今日河梁復送君三俊風流皆
北振九秋鴻鴈羣中分滄浪寂寞虛成賦芸閣歡
呼好撰文爲問唱酬誰最勝彥先應不讓機雲

贈俞念茲太守公曾爲洪承疇寮屬

秦州小試軼羣才制府還需借箸來江左名流堪
竝駕峴山裘馬獨登臺遙憐桂嶺烽千里暫醉蘇

堤酒一杯露布西郵誰可作看君草檄百蠻開

擬宮中行樂詞

曉日照披香春風入未央棠梨畱玉砌楊柳覆金
塘鳳奏歌喉緩鸞飛舞袖長十三新入御早已熟
宮商

鳳艦瀛洲雨龍舸太液波鳴橈驚翡翠盪槩出菱
荷墮葉雲鬟亂分香玉臂多待歸宵露下齊唱月
明歌

別殿春歸日紗窓午夢餘銀屏寒玳瑁畫檻夾芙
蕖院漏移鐘鼓宮箋註起居聖朝多盛事醑酒徧

窮閭

妙舞樂無方清歌夜正長
三花明繡髻七寶耀紅妝
玉柱調鸚鵡金徽拂鳳凰
半天燈火散恩愛昵君王

御柳碧絲飄宮煙紅蠟燒
人依青玉案花發翠雲翹
長日融珠管輕風度彩簫
更聞鑾駕近仙樂下瓊霄

錦袖約戎裝羅裙覆紫韁
鳴鞭陪羽獵按轡出長楊
狗監呼鷹遠宮奴射雉強
君王同絳帳歸乘勅飛黃

戴氏雜詩錢午莊手鈔未及註名而沒惟擬古三十首口傳爲同得之作而濤侯之芙蓉樓亦無考據今選若干篇謂戴氏亡名詩

送顧倩來銓部之金陵

百戰爭天塹臺城竟寂寥
江連三楚闊山接二陵凋
小渡維蘭槩官亭折柳條
從來重分手暫別亦魂銷

長安道

章臺初控駕紫陌更畱連
公子調金勒佳人墮玉鈿
關門雄伯二宿衛擁三千
何處芳林裏春城喚

言三選言
杜鵑

山陰雜感

劉蕡初下第王粲更登樓獻策疏經術哀時託遠
遊陣雲連海合殘月湧江流最是飄零盡錢塘古
渡頭

名士虛江左賢勞久越東魯恭猶出宰殷浩只書
空星驛黃封詔花韜白玉驄太平知不遠蹀躞自
嘶風

寒夜得人華書却寄

草草舟中別忽々遂至今書從昏夜到愁已一年

深所幸俱無恙依然共此心相期知不遠封罷更
沉吟

和顧銓部乞假歸里先寄親朋之韻

有客鳴珂下玉墀先貽雙鯉慰親知爭傳鄴下才
人句絕勝中郎幼婦詞夾岸丹楓看落葉扁舟寒
月照相思梁園浙瑟西風早重和歸來白雪詩

簡吳梅村

簪筆明光近侍臣即今詞賦定誰論從知東序推
前席孰識孫卿是後身三國舊愁江草碧兩京遺
事故山春不才未敢邀元晏尚擬登龍一問津

得松交予告之信

鴻書臘日達河濱
懶拂京華十丈塵
忽憶故園花滿徑
可堪燕市雪粘人
楊雄歲晚還持戟
張翰風流獨采蓴
聞道扁舟歸不遠
與君重話別愁新

花影樓與竹隱夜話

名山業在轉蹉跎
往日雄心付釣蓑
與世浮沉悲老驥
逢人屈曲鬪隻蛾
燒燈剔盡憐才淚
撫劍吟殘薄命歌
君自蜚騰雲路杳
可容嵇阮數相過

送竹隱赴浙中谷學憲之聘

選樓久已著雙瞳
暫借清光照越封
經月校讎忘

主客千秋賞鑒別
魚龍丹鉛寫盡官
帷燭白苧歌殘曉
署鐘元度風流宜
學政故應徵聘到
吳淞朗月清風便憶
君壯遊今已入青雲
文從南國才名早
寓向西泠圖畫分
禮樂討論憑記室
師儒望重藉叅軍
何當手握青鏤管
掃盡繁蕪照典墳

重陽日坐雨拂水山莊與牧齋話舊

高柳垂條拂院墻
坐深爽氣逼蓉裳
山雲作雨村郊失
庭桂飄風几席香
千古文章歸太史
十年詩卷寄滄浪
今朝又是重陽節
漫把陰晴共較量

讀玉峰盛訥夫詩

言三逸詩 真氏十名詩三 易安書屋
聞說山城大雅叢如君清老幾人同氣含松雨蒼
堪滴韻吐秋嵐淡自工士到坎珂聲調合交雖遲
暮夢魂通相思別有闕情處木落霜飛寒照中

懷許爛石

春來芳草幾回更萬里薜蘿滯客程滿眼兵戈銅
柱微經年詞賦錦官城登樓踪跡同王粲記室才
華羨馬卿還念秋來砧杵夜金閨引領不勝情
看君俠氣薄高旻多難猶存不壞身絕域鶯花羈
浪子故園松菊付閨人孤踪出處忘歸晉歷覽興
衰歎劇秦更值烽煙紛再起那能不念渡江春

贈王甫瞻之浙西

偶承題鳳到蓬門牀滿奇書子共論久學無成空
問齒相逢多難各銷魂日斜竹影羞煙態秋老蟲
吟訴草痕莫歎烏衣盡零落天涯應有念王孫

夢弔潘右岷醉後狂歌失足湖梁死

慷慨相逢話草堂半生筆墨五湖航數奇竟得沉
湘水世變應須返醉鄉日落野荒天地黑風號路
仄海雲黃宵來目徧歸鴉陣好共靈均聚一方

歲暮畱別管雪民

歸去山中正歲闌勞君空谷問幽蘭弟兄淪落心

言三邊詩
還熱仙佛行藏體自安煙外有人懷阜帽年來無
故戴黃冠門前便是瞿唐峽細雨深泥步之難

白紵春辭

春蠶繅成白雪絲巧奪七襄雲錦披新裁舞衣萬
舞宜華筵夜張列綺靡就中凝睇欲遺誰可憐絕
代傾城姿生長河湄未遇時上客掩袂且停卮聽
我一歌白苧辭

錦帆日暮春風和樓船夜泛生微波佳人敬坐顰
雙蛾自按紅牙接短歌聲之裊雲哀怨多人生知
已能幾何爲君痛飲金叵羅星河漸稀夜欲過雞

鳴喔之喚奈何

登君朱簾畫檻之高堂入君蘭桂蕙幃之曲房斜
抱綠綺彈清商彈作天池雙鳳凰朝飧沆瀣同翔
翺聞君裏糧遊遠方爲歡未幾增悲傷坐客調笑
何洋之銀瓶斟酒樂未央偷垂別淚獨幾行
春塘浩浩春流咽褰裳欲渡舟無楫裁成短書奉
君篋鴈訊魚緘莫斷絕學書初學換鵝帖字挾啼
痕聲切之爲君新浣春衫潔守禮揚詩終不越我
歌白紵歌方闕空山梅萼總穿葉

送家雲葉白門秋試

錦帆涇畔笙歌歇，畫橋低處垂楊接。旗亭爭唱秣陵秋，賓興才子稱雲葉。雲葉家世同剡谿，自幼聰明淨冰雪。早歲聲華動辟雍，調高意氣凌宮闕。卿孃宛委萬卷書，青燈炯炯雙眸攝。講易咸驚輔嗣才，談詩不數匡衡舌。文辭陸離工馬楊，樂府琳琅追宋屈。彩毫落紙雲霞鮮，春流倒瀉荆門峽。興到常書白練裙，墨華珍重來禽帖。君家石房號子瞻，物論推兄似蘇轍。所恨數奇運不逢，風塵黯淡龍泉鐵。往年空問浙江潮，今朝還看吳宮月。執手臨歧，意慨慷。醉後瑤琴碎如屑，英雄會遇各有時。文

夫出處非無說，君不見當時蘇季下咸陽。黑貂裘敝黃金缺，還來射策東諸侯。立談卿相須臾掇，又不見淮陰初謁項。重瞳寂寞風雲渺，難合一逢泗上亭。長雄朱旗阜蓋開，黃鉞方今國士有幾人。秋濤汨汨藏鱗甲，金印還須猿臂收。珠鈿終爲蛾眉設，碧渚芙蓉露漸濃。小山叢桂香堪折，此去乘風奪錦標。江干聽奏南闈捷，鹿鳴歌罷賦歸來。高山鶴叫青雲徹。

清明行

君不見昨夜寒食雨，翻盆池塘水漲流。到門今朝

清明更微雨遊子誰能不斷魂勸君莫遠涉遠涉
多苦辛忽逢時節改遙憶京華春京華魏峨千萬
戶朝暮暮雜歌舞漢宮十六未足誇秦關百二
誰悉數可憐金谷變荆榛不信銅駝委荒土複道
華光半入雲二陵山色全經雨俄聞馳驟千里譁
銀鞍玉轡爭看花腰懸大羽手巨闕後擁大燾前
高牙行人競避垂楊裏誰知反遇七香車香車少
婦多妖婉蘅臯梓澤遊應遠蛾眉蹙黛凡幾重夫
壻滋蘭得九畹不嗔昨夜風雨多却惟今年寒食
晚灞陵原上多少年年此日常盤桓有時鬪雞

東郊道或擲畫卵如弄丸不知何處秋韃影自取
兒童簇逐看流連團聚綠堤上下疊糴瑜上綃帳
醺醪光浮琥珀紅飛觴流作桃花浪羅敷却習延
年辭嬌歌翠管聲嘹唳就中促調悲遠天有客行
邁祇自憐自從旅食來宮花紅欲然如何經喪亂
麥秀還漸漸南浮將謁蒼梧帝北望空訪崆峒仙
那知塞外久多事只今紛紛將戍邊戍夫一去幾
千里賤妾金閨慵未起夜來夢到玉門關不見春
花見枯髓門前車馬日喧喧佳節羣遊伊水園神
仙遙慕李膺棹名士多誇北海尊亦有臨流鄉思

切帝里沉沉淹日月不聞烏號助客啼惟見野館
頻花發珊瑚槌碎誰復償唾壺一擊口還缺我家
迢遞隔雲嵐名都隱軫浸蛟潭鳳凰山上花如錦
鸚鵡洲中草正愁勸君一巡酒離愁再莫彈自非
庾開府曾不哀江南歸去來思古人春風春雨盡
芳辰願回自有樂原憲未爲貧何用得知漢與晉
但向桃源去避秦

上元行

君不見新歲初臨上元節萬戶千街燈火接朝來
一試落梅妝今宵踏徧春城月春城月出照樓臺

是處銀花爛漫開絕從閭闔門邊去遂向吳趨市

裏來吳趨自昔繁華里繡箔珠簾相對起五都萬

寶盡梯航碧鳳鸞鸞如畫裏王孫綺館列瓊筵一

箸常拋十萬錢家醅久釀蒲萄熟玉饌應分海錯

鮮酒酣起踏鼇山側倏忽西城復南陌萬燭輝搖

明月光千燈却亂春星色誰家仙樂奏雲璈何處

高樓弄碧簫歌爲繞梁憐素口舞因長袖惜蠻腰

遊絲忽冒青驄騎半捲朱帷斜寶髻蟬鬢新梳宮

樣妝凭欄似識懷人意紛紛遊隊各成行却逐魚

龍戲廣場爭道花街新舞鳳誰知鶴市舊乘羊就

言三遊詩
真氏下名詩
易安詩
名詩
易安詩

中別有侯門客挾瑟吹竽侗顏色昨夜貪眠許史
家今朝爛醉金張宅正逢結伴出遨遊簇之羣看
小莫愁燈光恰照珊瑚枕月色偏臨玳瑁樓亦有
征人悵離別思婦深閨恨秦越只今三五好良宵
翠被鴛鴦和淚疊儂家姊妹盡乘龍桂燼蘭膏徹
夜紅自有晶盤娛笑口無勞青鏡照愁容可憐笑
口歡無極莫使愁容增歎息男兒不遭君相知詞
賦雖工竟何益不如痛飲更徵歌步障風迴聽玉
珂相逢醉眼半相識聯袂交衢無輒軻此時月地
遊應徧蠟炬高燒接河漢調笑凝眸樂未央墮珥
遺簪眼撩亂年年燈月映簾櫳青草芊芊發故宮
試問館娃當日事繁華還與舊時同

南湖歌寄家兄

南湖三月蘭橈多美人蕩槳臨煙波晴絲冉之百
鳥弄對酒忽作南湖歌儂家世本鳴珂里日掬湖
光弄湖水鼻祖雲孫三伯年不種蓬蒿植蘭芷東
隣藝蕭々滿蹊榛蕪刺眼渾欲迷靈均樹蕙盈千
畝名卉恥與羣芳齊只今春深旭日煖家家種桃
桃復滿昨宵一陣風雨聲落盡繁華春不管湖頭
脊鴿常苦饑燕雀啾々祇苦肥秋高風厲鷹隼怒

搏擊毛羽無光輝憶昔初膺合歡薦越羅吳紵都
璀璨本期華萼雙畱連寧知蕭颯悲團扇珠簾晝
垂繡幕香失却和鳴兩鳳凰此時湖流亦倒瀉飛
鳧畫鷁總渺茫我行覲此三歎息欲賦長來安可
得雨覆雲翻本世情且學早棲斂六翮我將振衣
從爾遊請君漫植鸚鵡洲曉日經行水西寺晚來
遲月胡公樓君未半百已顛顛我總四十久白頭
趙州行脚最遠涉虞卿著書空窮愁不如痛飲營
糟邱日嚼金卮解我憂君不見天邊鴻鴈飛還倦
關塞蕭條歎阻脩

周靜齋移居澣野歌

使君昔居虎邱山劔池日日弄潺湲南皮名彥常
滿座北海尊酌無時閒一朝辭山被簪紱齊楚中
州垂政績驥足奔騰雖展舒十年不到千人石此
石當年解點頭思君不見爲君憂駟馬從來易傾
覆不若歸來登舊邱舊邱風景依然在舊遊零落
應增慨芳草堤中鞍轡多不是當時舊冠蓋囊中
恰剩買山錢買得名園好息肩階前盡植子猷竹
竈裏多烹陸羽泉豈知名勝俄蕭索鐵騎長驅半
城郭銅駝此日尚荆榛何況君家一林壑可憐臺

言三進言
真山十名詩
樹北城隅拙政歸田位置殊相國已馴遼左鶴小
臣空墮鼎湖鬚可憐汗漫亭前燕歲歲春花銜片
只今繫馬畫欄間誰惜飛花過水面雖然癖嗜
在雲林韋曲煙霞未可尋憑君卜得江關宅一水
到門清且深故園回首真恓惻却喜舊邱還咫尺
早勸君歸君不歸不笑君癡爲君惜君今理楫釣
晴湖我亦從君乞鱸鱸青牛道士如相過爲問山
中安穩無

秋懷

涼秋悲已深衰草芳未歇徘徊搖落候貞素君子

節虛園常掩門况乃倦行轍萬籟真歌吹多愁生
曲折初聞蜚鴻鴈旋訝啼蜻蛉上有風颭鳴下積
霜華屑客攜連城瑛迢迢獻金闕諒非鼓瑟愚何
用遭三刖未若西隣姝空闈守冰雪寧知豔陽色
轉爲商秋壓昨夜芙蓉堤微茫浸纖月雖懶庾公
興猶釣寒潭鰕籬菊方淡麗濁醪亦馨冽綠綺橫
玉牀幽徽發林樾即事多雅調臨風緬前哲想見
悲秋人秋光自怡悅

遊爾福寺贈澡雪上人

偶從村墅遊却入招提境長廊閉虛殿疏林匝清

言三逸詩
影晴旭搖湖光一碧澄萬頃水鏡涵遠秀綠葉傍
階靜稍西叩元闕曲折頗幽迴谿午鐘磬寂厨空
爨煙冷澡公靜者流拂塵諧談哂煑君峒山茶啖
我春園筍憶昔兒童時飛動愜馳騁婆娑老樹傍
歡喜聆玉軫如何廣陵散人琴竝消隱樹老猶半
枯余髮安得鬢客歲贈我詩句法全清醒齊已邁
後塵皎然信前準偕遊有顧子賦才追謝沈及此
浮生閒逸趣暫同領嘗聞遠法師高臥廬山頂還
許陶淵明共聽蓮漏永何況爾與余本是同鄉井
會須謝塵鞅結社蓮花嶺

戴穎昉字普貫號濤侯章甫第三子明崑庠生
與許人華竹隱馬士延管公遠結五子社中峰
僧白谷亦與焉一時名士若尤西堂徐昭法輩
皆樂與遊其賞梅序云一生有朋友摯有山水
緣有讀書淫有法帖名畫癖鷗鳧可狎而鸞鳳
亦不見拒者濤侯也晚皈即中師名受會所製
僅存芙蓉樓詩草性命叢談生萬歷乙卯卒康
熙丁巳壽六十三錢午莊葺其橐未竟而沒此
節錄其敘文也

寄樵李吳詢庵 枕上草陸序東藏本

鶯脰湖邊月龍眠寺裏鐘論文椽燭短看劒酒杯
空伏枕違良約修書逐斷鴻稍需籬菊滿促坐舫
樓東

腰佩吳鈎瘦書傳越絕遙雄心垂弱柳別淚聽奔
潮事豈譚兵著名因學佛銷比來貧病劇有負故
人招

江南行贈許竹隱下第

江南三月穠桃李新燕初旋營舊壘耳邊榮貴捷
音飛浮雲不礙澄江底祇恨才人失意歸往時魄
礪重復肥蛾眉不貯黃金屋猿臂空穿肘鐵衣即

今國士誰堪比許君才名真鵲起胸頭武庫森如
林筆底雲霞散成綺年來著述重雞林洛陽紙貴
傾都城家謳戶頌竹隱業嗜愛不減侯門鯖高吟
時出清歌妙杜陵丰骨青蓮調洗盡繁華雨後山
微鋪粉澤秋花笑雙眸炯炯懸秦銅汝南藻鑑人
物宗金閭文牘積邱嶽丹黃一出次第空隔歲攜
裝上薊北嚴冰正合貂裘肅雄心五夜蹴聞雞夢
到中原爭逐鹿祖帳高歌行路難人生富貴非徒
然予也衰榮闕至戚孤心日繞孝廉船脩焉春煖
杏葩發遙憶簪花朝鳳闕天上常輸碧玉盤人間

不識龍泉鐵驅車徑出長春門怒濤倒捲黃河奔
奇文廢落遺蘇軾封章傳誦嗟劉蕡歸來把酒長
干道石徑青苔隨葉掃故人多病臥三秋愁腸百
結添懊惱於戲君不見當時董相與長沙年過三
十功名賒豫章千尺棟梁器肯與繁英鬪麗華
寶刀歌贈陸彥斌

涼飈四起號竹木滿座陰雲暗書屋床頭忽睹霜
華明夜半凝輝耀玉燭陸生出示寶刀看謂從燕
市酒家鬻一泓秋水照鵬鷄萬丈虹霓眩文縠精
靈在匣風雨鳴神威出鞘妖魅哭生平愛割兒女

情只此知心爲骨肉上下黃河數千里殮冰齧雪
同棲宿舞罷常尋劇孟家興來欲入要離腹所恨
英雄命不猶此刀不用仍還縮中原鼙鼓動地喧
下澤鱷鱓莽相逐王生閒却綠沉槍漢家不候沒
羽鏃雜珮空盛六月寒青鋒未樹三軍燾剗犀斷
兕名久傳螭龍七首還歸袂拂拭相看雙淚零雪
花手墜尊前綠於戲君不見山陰戴子手持三寸
管寫盡奇文累千軸雲霞璀璨光陸離亦如此刀
臥林麓

送陸瑞卿赴佟督臺之召

黃鵠矯：當雲霄長風萬里同飄颻食君稻梁處
君苑羽翮離披不敢驕看君昂藏負意氣虹霓貫
日生睚眦笑指荆卿劍術疏偷將晉鄙兵符至但
逢嵇阮即沉酣寧許李程相睥睨十年躡蹻紅塵
間黃金用盡還顛賴一朝東帶謁羣公綠衫黃綬
趨忽：男兒七尺何不有有時爲蠖時爲龍孫劉
事業悲歌外屈宋文章指顧中平生感慨不平事
且付江水隨西東鄉里小兒如作色但言下吏難
爲工

徐克勤席上贈吳太史梅村

夕陽映水留殘紅崗前竹樹煙濛：臨池置酒月
照席空明激盪當杯中知君才名三十載簪筆出
入蓬萊宮記纂常兼左右史平生頗狎漁樵翁懸
榻南州有孺子移尊北海來孔融勸酬淹留忘夜
漏談笑磊落成虹憶予往年爲博士讀君鴻文
如漢史阿閣從來待鳳凰天閑終鮮逢騏驎廟廊
之具有幾人狂瀾旣倒須扶持蒼生引領望安石
東山一起帝王師

寄孝廉徐昭法

承君懸榻費盤飧促膝同歌行路難薇蕨幾回陳

言三邊詩
木一
豆芰荷無恙製衣冠傳詩暗灑王褒淚躡屐深
憐羊仲單歷盡繁霜顏不改入山常作楚囚看

病中柬元功雲葉兩兄

春盡成離別天涯昧起居魂銷家難後夢醒酒壇
餘筭篋添新草交游絕故廬自憐孱弱影秋水對
樵漁

藝苑知名早相將兄弟難謝家餘玉樹荀氏號龍
鸞屈折悲前路聲華想舊班升沉關族誼把劍帶
星看

劇病呈即中本師十首之一

伏枕還叅妙喜禪呻吟不爲博人憐方書懶辨君
臣義疾痛頻呼父母前慈澍一編餘止觀心魂百
雜到元籤何當強起支羸骨細讀山宗侍講筵

贈徐霽之

張林聚落濱陳湖湖光一抹青模糊板橋西下桃
花村中間映帶楊柳疏荻墟夕照風雨急青浦歸
帆如畫圖磧沙晚鐘杳不發蓋濠酒肆誰復沽雙
峰挺峙古陵塚上有神廟稱嵯峨嵯峨不減上方
祠晨笛暮鼓傾江沱誰其主者徐孺子雪深三尺
眠林窩學書不羨銀魚袋學劍不羨金僕姑樗蒲

言三逸詩
一擲伯萬緡豪氣欲追劉季奴牀頭金盡少顏色
酒後耳熱常悲歌歌到月明腸斷處人情薄似秋
雲多何日掀眉出門去往事毋乃傷蹉跎予言此
世傀儡場長安富貴奚足都公卿偃僕馬廐傍簪
纓下隸廝養徒乞哀暮夜驕白日丈夫意氣胡爲
乎徐君於此三歎息樵頭犢鼻沉煙蘿開軒懸榻
揖余住所夕譚笑當萱蘇老梅修竹拂檐几陶尊
瓦壘紛盤盞或時荷檐登土崗白雲雞犬相摩娑
否則落日放船去煙波萬頃披漁蓑於戲綺園舟
里豈終隱其如漢高未遇何

送長兄圓師赴許思州館席六首之一

積久多疑難忽々未得傾故知倉卒語難盡古今
情絮衲春風厲奚囊貝葉輕行踪如野鶴蕭灑剩
閒身

送長兄圓師之鵝墅舊門人張閑存齋頭度
夏

黃梅雨過日色鮮葵榴錦簇迷晝煙阿兄向來離
火宅雙趺何處常安禪書來示我之鵝墅居停重
過張緒園當年曾授梁邱易今日還思戴記傳邀
師爲作清涼話雪寒六月峨眉巔闔門紫氣高萬

丈吳淞旭照催放船錫飛不憚江水闊鉢空如漾
秋月圓挂帆掉首那回顧賸有俗弟思拳之質經
辨論何所倚長枕大被空纏綿中堂遺書千百篇
精神傾倒華頂邊座上笙簧誰繼述唯兄舌上生
青蓮高山流水千秋調何人撥響鍾期絃此行須
探物外意寄語室中謝惠連

東邃谷師

自君叅學去蓮社散如雲門掩孤燈雨香銷萬帙
芸同悲千里驥共愛六朝文能不懷生摩秋山話
夕曛

閔暹字曙公號邁庵載里志其壻許陸圻有傳
裔孫德傳藏詩文二卷在徽州府幕中作餘載
隨穎錄探驪集

贈吳孔碩

文星掛斗照天都羣羨名家有鳳雛璧水橫經綿
理學橋門聽講贊嘉謨路執篆隸人爭睹玉椀金
莖露正濡好看潛蛟翻浪出展開頭角到亨衢

和邱宗尼賞桂韻

子期曾識伯牙心俯仰之間卽古今世上百年能
幾日花前一醉值千金深秋天氣蒸寒馥新月庭

階弄小陰香在樹間杯在手笑將俗筆索清吟
和送春

客中歲序易因循轉眼韶光又送春逝者如斯真
是夢留之無計若爲賓落花飛絮經年別小院啼
鶯得句新回首山塘詩酒興夕陽孤館倍傷神

贈新安僧

清尊蓮社喜同遊撇却瀟湘一段愁山水有情爲
作合詩文無字不風流坐殘紅蠟三更月看徧黃
花十寺秋幸得仙源逢此地豁然金篋刮雙眸

送別

故鄉人作他鄉別況值霜林葉變丹路入寒山皆
有色月明秋水不生瀾離筵罷去風添冷遠夢驚
回心更酸計我歸期無幾日煩君先爲報平安

春日過許孝酌山莊

久抱林泉癖園居得暫同竹屏開窈窕蓮嶼映玲
瓏石斷平橋接溪彎短棹通蒲團花底坐人在輞
川中

小立迴廊下香塵扑面來花飛時作雨筍出乍聞
雷唼水知魚樂投林看鳥回此中人事少招隱什
堪裁

和邱宗尼中秋夜月韻

千山萬山白於雪誰家不賞中秋月浮雲捲盡碧
天寒光照古今同一轍此時無限故鄉情我是越
人還思越逝者如斯可奈何隨時憂樂憑詩洩良
辰幸遇知己飲一觴一詠互相挈先生妙筆追古
人曹劉沈謝是其列冲然澹遠有餘味糟粕洗盡
芳香擷我久廢學如竽笙吹之艱澀少精核瓦缶
玉石思同登捧腹一笑遲而拙勉強追和聊復爾
對君何敢較優劣詩成酒醒過南樓西風瑟瑟
音切呼童洗琖更開尊要須酌酌酬佳節

陳元搗字仲謙大姚白陽山人之後也人品未
詳考其詩意乃生長於明而沒於國朝者徐
雪厂錄其遺藁甚富今藏其裔受谷家

贈袁九州畫馬行

畫馬昔聞首曹霸韓幹得之入神化數百年後趙
王孫五花點染亦無價前後將逾五百年接其武
者竟杳然遂使天閑俱無色穆王八駿渺孰傳於
都幸有袁伯子鼎足曹韓精妙理骨幹權奇色
真嘶鳴料擻乃如此烏騅赤兔照夜白飛黃紫騮
絕塵黑五色燦爛雜隊行亦畫亦真分不得憶昔

燕昭築駿臺郭隗定價求真才遺骨猶然未易尋
何況滿紙俱牝駮袁君擱筆長太息世間俗眼安
能識若是人中有伯樂一幅千金何處覓君不見
按圖索駿相蝦蟆真假毫釐千里差又不見鹽車
頓足無暫停可憐伏櫪徒悲鳴今得袁君寫出三
花鬣壁閒夜半聞蹏齧逐電追風筆筆鐵自此人
間無汗血

螺居對雨尊酒陶然醒來賦此

嘗讀醉鄉記不知醉鄉樂我遊醉鄉中醉鄉殊不
惡天地如混沌日月常昏濁人民無往來萬物甚
寂寞聞古華胥國戶封忘晦朔悶々復醇々無巧
更無樸官屬不須置禮數何必縛約略此中致仿
彿醉鄉若雖云風味同遙聞安所托然則居何在
醉鄉吾土著舍曰必擇鄰睡鄉爲附郭優哉亦悠
哉遊神乃合漠

炒蠶豆

凌秋暑氣平清宴誠寂寞流玩旣目窮停批亦居
索何心動谷神火菽已盈橐嗶卜齒牙聲浙瀝座
飛殼憶昔浴蠶時連畝綠垂角傾筐屬飽飡甲除
還佐酌餘粒漸成堅韞藏時待燂雖非甚佳味破

南里逸詩
寂儘可嚼豈無粟與榛貧家風味薄豈無益智美
品貴遠藜藿豈無火山荔紅塵何處落譬如摘桑
椹譬如拾橡剝香脆自怡人療饑復不惡敢云忘
肉味此時聊廢擱敢云厭嘉珍願外非所學記得
先聖言其中有真樂

小春徐子瑚山房話舊并言別

我非陳仲舉孺子是南州小築松雲護蕭齋邱壑
幽三杯廿年事一嘯萬山秋言別情無竟夕陽天
尚畱

一徑襲松陰衡門深復深書聲白鹿洞談笑碧雞

林犬吠雲中應禽調天上音人酣山亦醉扶我出
東岑

夏夜納涼

書聲寂靜講堂幽籬豆棚高暑氣浮柳暗池塘蛙
咒雨風吹漁艇笛飛樓酣餘每覺眠多味浴罷還
憎汗不收此際涼颼刮地起我將攜月傲丹邱

同馬仲玉昇兒過聚陽村張如蘭家

曳杖來三徑東籬菊正芳茶聲花外韻酒味座中
香遂竟層々圃因循小々莊雖非元亮宅遮莫已
柴桑

對雪

白戰千山萬壑搖
六花鋪徧冷溪橋
先生擁褐衡門下
獨自吟詩破寂寥
旗亭對面白糝糊
童子冲風踏雪沽
不道酒乾瓶罍恥
閉門依舊撥寒爐

赴館金山出門感懷

交謫傷心緒飄然
忍絕裾揚帆欣破浪
彈鋏愧歌魚多子
應增累出彊且載書
幾回思鮑叔千古擅
芳譽

晚次福田寺別楊世延

元夕舟行晚客心
望海城歸鴉銜暝色
古寺納潮聲野燒髧
修岸天衣掛小晴
不堪言別處分手獨
關情

九日登查山有感

白楊風起樹蕭々
立馬山巔首重搔
鴻鴈有懷空望遠
海天無緒獨登高
止因餬口來東國
遂把流年付濁醪
却笑蒹葭官舍滿
缺彈不解念緜袍

同馬曠若課茶莊訪瑞能師不遇題壁

挈伴尋茶課莊疏
籬落寬結茅畱竹
翠規澗引泉寒松
影交鋪地山光上
曲欄遠公不可見
幾樹老

梅殘

抵家

作客雖未久離家兩月多歡呼兒女慶剝啄故人
過車馬身猶健風塵鬢欲皤顏當羞澀處囊計一
文何

秦淮寓樓晨起喜霽

無聊客起望朝曦雨後秦淮變幻奇雲散橋邊樓
閣見風迴簾外管絃宜如鸚柳色蒸霞碧似練湖
光弄日遲東望鍾山浮翠黛爭妍猶讓曉妝眉

葉家橋晚眺

山之煙靄夕陽低橋上駸々望欲迷霜影預留寒
色地故邀明月印前溪
一輪紅日下晴川鴈字穿雲斷復連煖氣未收寒
尚淺萬山俱醉夕陽天

石湖

湖光渺々荻芽肥水色山容蕩槩迷白鳥畏人翔
不下片帆畫破碧琉璃

旱涇

沿堤竹木意蕭疏掩映青山入畫圖茅屋檐低籬
豆引短棚不礙試茶爐

懷友

雲織天衣翠作屏橋橫一水野塘清鴈奴魚婢無
消息咫尺鄉城萬里情

木末亭弔古

灌木陰深護短亭崗紆徑僻遠紅塵雙忠祠外斜陽
裏猶見愁雲一片橫

屠質卿姜譚二姬小飲聽月齋口占

日暮南塘路行行過野橋開尊聊待月引鳳有吹
簫寒菊清齋媚紅妝狎座嬌主人情自重絳蠟已
高燒

對盆梅有感

只爲歲寒矜傲骨開雖幾朶亦精神行藏爾我真
同調各抱清香看世人

輓明茂苑學博劉欽爾先生

故國王孫首耆齋遙臨茂苑講堂開方祈脩甲翹
雲路不謂亡家卧草萊處士碑題終冠晉逋臣絕
粒竟投骸遊魂莫向江頭望月慘風淒鴈北哀

咏古墻樹影

疏疏密：化工描墻作鵝縑粉作綃遇雨還同沒
字碣迎陽仍繪有情條嚴霜不會添顛賴風利何

常有謝凋最愛月明如水浸一池荇藻手難撩

春日偶成

忽々花事展風光紫燕銜泥上畫梁捲起湘簾春
晝永三杯蘿峽一爐香

濛々細雨養花天遠浦垂楊半織煙紅紫漸稀春
欲老喚人好鳥破愁眠

雨後吟

山雨報新秋南軒暑漸收繩牀清夢足紙帳白雲
流韻細鐙調火聲繁竹喚鳩瓶花香筆硯人與物
俱幽

